

論

語

詳

解

論語詳解卷十四

郝敬解

憲問第十四○諸弟子貧莫如原。憲故次之而篇內所論多當世權豪。

憲問恥。子曰。邦有道穀。邦無道穀恥也。克伐怨欲不行焉。可以爲仁矣。子曰。可以爲難矣。仁則吾不知也。

原思爲宰。常祿亦不受。狷介之士也。其問恥以自質也。苦節非廉。祿以養廉。非可恥也。雖治世無大用之才。亂世無匡濟之畧。碌碌素餐。乃爲可恥。有功食祿。何恥之有。狷者有所不爲。而不能有爲。故夫子勉勵。

之原。思謂無恥生于怨欲。怨者恨己之貧。欲者貪人之有。此念萌而不禁。見于行寡廉鮮恥。是以不仁。今能克之。伐之。使不得行。以理制情。可以爲仁矣。何但免恥乎。思蓋自許也。克猶去也。伐猶斬也。克而又伐。極力懲窒之意。萌諸念爲怨欲。見諸行卽伎求恒人。有此念必行。仁者初無此念。何待克伐而始不行。有而不行。亦人所難。差賢于色取行違者耳。本源未淨。終非大公之體。惟以難爲仁。故以苦爲節。不能廓充致用。正爲此方寸未得洒然。廉恥亦是矜持。仁者欲而不貪。何用不滅。恥不足言也。

穀卽祿也。以功詔曰祿無事食曰穀。怨欲便是攷求。子路不攷求故不恥貧。原思不怨欲故不受祿。言克好勝也。伐誇張也。與怨欲並四非也。克伐猶言克治也。克如克敵非無敵也。伐如伐木非拔本也。故但謂之不行如顏子克己。知幾如石。德性常主素位而行。有何怨欲。本無萌蘖。何煩克伐。自無可行。何待不行。如此方是全體之謂仁。今旋生旋克如捫漏舟。勞而罔功。故曰難耳。善學者易簡直捷。當體全真。得力處自省力。何難之有。佛氏變怨欲爲貪嗔。以不行爲頑空。以難爲小乘。以仁爲大乘。謂斷想絕念如運石。

壓草故步。能云惠能沒伎倆。不離百思。此旨。
世儒盡割以予佛。諱而不講焉得。

仁者事理如一。合內外之道。恥在心。有道無道。發諸
事業。顯微無間。便是爲仁。原思有怨欲而仁不行。內
外顯微。析爲二。便是未識仁。朱子割克伐以下別爲
一章。非也。

子曰。士而懷居。不足以爲士矣。

士。學道者也。懷。戀也。居。猶安也。語云。宴安鴆毒。不可
懷也。懷居者。志在溫飽耳。進德脩業。總由此廢。小人
懷土。慣成窠臼。掃蕩窠臼。便克己復禮而爲仁。精之

便無可無不可意所便安處不止衣服宮室聲色貨利凡改過不速遷善不勇聞義不從一切行藏取舍有所留滯皆爲懷居好學惟無求安飽疏水曲肱陋巷簞瓢聖賢所以大過人者安安而能遷也

子曰邦有道危言危行邦無道危行言孫

遜

此因上章懷居類記之危恐懼貌天下何時何處無危幾君子處世安不忘危治亂遇也言行樞機也榮辱之主也遭逢雖幸不以無事而忘戒況無道行危益可知矣而言尤易于招覺孫順也危言者言惟慎耳在有道時抗論猶可無道則言必遜順危之至也

書云惟口興戎危言也詩云如履薄冰危行也夫子
答陽貨言孫也其作春秋無毀譽繼詩人溫厚之意
無道默足以容也舊解危高峻也君子不乘危不行
險聖人豈以危道教人乎高峻非聖賢氣象

程伯淳曰凡言理勝則事明氣忿則招拂理不勝君
子固不敢言理雖勝而氣不和平不能入人且招禍
在無道尤所當慎也孫言便是危言之心言更加遜
讓耳

子曰有德者必有言有言者不必有德仁者必有勇勇
者不必有仁

此爲尚言好勇者而發言與德勇與仁迹相互有德者常闇然渾朴然亦惟渾朴者多英華蓋中有寶則言之親切而味永順理成章自然之文也如以言而已中未必有也徒事勦襲並其言亦非矣仁者常頽然柔順然亦惟柔順者能奮發蓋中無繫累其氣自伸不憂不懼浩然之勇也如以勇而已自反不縮強爲激昂並其勇亦非矣

有德者必有言文章卽是性道如堯舜言中方是中孔子言一方是一有言者不必有德但落言詮卽非實際矣仁者必有勇當仁則不讓也勇者不必有仁

外剛內多慾也

南宮适問於孔子曰羿善射

羿

盪舟俱不得其死然

句

禹稷躬稼而有天下夫子不答南宮适出子曰君子

哉若人尚德哉若人

班彪王命論數百言不如南容四語商確古今慷慨
蘊藉要言不煩其論羿羿不言篡弑而但敘其荒淫
尊禹稷不頌功德而但誌其勤苦自古詐力取天下
者仗他人爲爪牙且望長世羿羿身負材力自保諒
有餘而執意身尚不得其死躬耕者終歲勤動不免
饑寒但得飽煖已足豈有膺圖受箴之想臣等乃爲

天子可知興廢成敗大分素定士君子處世惟有樂
天知命反身循理而已當世士大夫若有此識量何
至紛紛如五霸諸侯大夫之所爲乎夫子目擊時事
進言之隱衷作春秋之本意三兩言道盡所以不復
直辭而歎賞于退後也君子美其人尚德高其識南
容平日三復白圭沈默寡言而忽發此論包羅古今
兼否人物毫髮不爽非區區以禹稷比夫子羿稟比
當世而意在其中矣究禹稷躬稼之理卽顏淵云不
容何害之意夫子謂回也使爾多財吾爲爾宰與稱
南容君子尚德意同

羿夏后氏有窮國之諸侯善射弑夏后相而自立淫于原獸用寒浞爲相寒浞殺之取其室生二子長澆次豷澆多力卽夏與傲同善射荒于畋也澆舟荒于遊也舟遊曰澆皐陶謨云罔水行舟舊解謂夏力能陸地行舟無稽夏爲夏后少康所誅與羿俱不得其死然者謫議之辭

稷名棄帝嚳之子帝嚳元妃姜嫄出祀郊禘感大人跡生子怪之棄于野鳥獸皆字之收而養之遂名棄長善稼穡堯用爲稷教民有功封于郃別號爲后稷周入始祖也或疑禹未躬稼水土稼穡事同也書禹

曰暨稷播種奏艱食詩曰是生后稷纘禹之緒功德
一也○舟周也船循也黃帝見浮葉爲舟淮南子云
古人見獸木爲舟或云伯益作舟關以西曰船關以
東曰舟吳曰艚晉曰舶海船曰艚船曰舩江船
曰艦艦戰船狹而長曰艦衝二百斛曰舩三百斛曰
舩舩小曰舩

子曰君子而不仁者有矣夫未有小人而仁者也

仁者以萬物爲一體君子志于仁存心天下而時勢
或阻情境未化萬物一體之量缺而未滿要其心本
無私不害爲君子也小人惟知自利一膜之外爲胡

越塊然行尸走肉無復痛癢相關之意良心不以小人殊而究其公私善惡一舜一跖相違天壤此論人品之極致也解者以一念存亡之介辨之則正不相反小人非無惻隱而欲立立人欲達達人惟仁者後能若夫博施濟衆堯舜猶病其何有于四凶乎

子曰愛之能勿勞乎忠焉能勿誨乎

愛勞朱註分父子君臣以父對臣以子對君非立言之體君之于民亦未嘗不愛勞也臣之于君亦未嘗不忠誨也臣于君忠愛兼有忠愛兼有之謂之忠愛兼有者尤忠之不容已也君子之愛人亦猶此也

正而大乃善成其忠愛兩字有商量果若真愛自不容不勞果若真忠自不容不誨勞雖難任然勞于暫者逸于久其爲愛也深誨雖逆耳然逆于耳者利于行其爲忠也大若鄭武姜之于叔段衛莊公之于州吁愛而不教終成凶戾猶饑而食之以毒也適以害之

子曰爲命禪皮誡甚草創之世叔討論之行太子羽脩節之東里子產潤色之

命辭令也書有命有誥有誓皆辭也春秋晉命于蒲周禮大祝六辭二曰命孟子葵丘五命此則交鄰之

辭也。裨諝以下四人皆鄭大夫。子產其大夫執政者也。草創草率創始也。世叔子太叔游吉也。古字世與太通。故太子稱世子。討尋求也。論講議也。行人奉使之官。周禮有大小行人掌朝聘會同之禮儀者也。脩飾脩削增飾也。東鄭東門也。里居也。猶魯東門裏仲宋桐門右師之類。潤色文彩也。子產聽鄭國之政有事大國多所專對。集衆思。誦羣策。皆其力也。鄭本東周畿內小國。介于晉楚而鄭事大。恪謹以辭命諸侯。皆賴四臣同心故。意無不盡。人之有技若己之子產近之矣。衛北宮文子云。子產之從政也。擇能

而使之馮簡子能斷大事子大叔美秀而文公孫揮知國之爲而辨于大夫之族姓班位貴賤能否而又善爲辭令裨諶能謀謀于野則獲謀于邑則否鄭國將有諸侯之事子產乃問四國之爲于子羽且使多爲辭令與裨諶乘以適野使謀可否而告馮簡子斷之事成子大叔使行之以應對賓客是以鮮有敗事晉叔向云子產有辭諸侯賴之此也

按辭命非國之典要也竭諸大夫之力以謀國而區區辭命是急聖言非盡善鄭也蓋傷魯之諸大夫敵師壓境而專對無人耳時季康子當國子服景伯從

言言言
政吳王夫差爭霸哀公七年會于鄆吳徵百牢景伯
不能辭如數予之吳大宰嚭召季康子不敢往使子
貢辭乃免八年吳伐魯爲城下之盟景伯又不能辭
十二年公會吳于橐臯吳尋盟公不欲使子貢辭免
吳人欲止衛侯景伯以幣假子貢往說十三年會于
黃池吳人將以公見于晉景伯不能辭吳人囚之季
康子執政妨賢不如子產善任夫子歎鄭諸臣所以
愧魯也

淮南子云禪讓出郭而智以成子產之事○子大叔
公孫偃之孫以王父字爲氏繼子產爲政黃父之會

趙簡子問禮于大叔對曰。禮天之經也。地之義也。民之行也。天地之經。民實則之。則天之明。因地之性。生其六氣。用其五行。氣爲五味。發爲五色。章爲五聲。淫則昏亂。民失其性。故爲禮以奉之。爲六畜五牲三犧以奉五味。爲九文六采五章以奉五色。爲九歌八風七音六律以奉五聲。爲君臣上下以則地義。爲夫婦外內以經二物。爲父子兄弟姑姊甥舅昏媾姻亞以象天明。爲政事庸力行務以從四時。爲刑罰威獄吏民畏忌以類其震曜殺戮。爲溫慈惠和以效天之生殖長育。民有好惡喜怒生于六氣。是故審則宜類以

制六志審行信令禍福賞罰以制生死哀樂不失乃能協于天地之性是以長久簡子曰甚哉禮之大也

○公孫揮字子羽魯昭公元年楚公子圍聘于鄭娶于公孫段氏伍舉爲戒將入館鄭人惡之使行人子羽與之言乃館于外旣聘將以衆逆子產患之使子羽辭曰敝邑褊小不足以容從者請墀聽命令尹命大宰伯州犁對曰君辱貺寡大夫圍謂圍將使豐氏撫有而室園布几筵告于莊共之廟而來若野賜之是委君貺于草莽也是寡大夫不得列于諸卿也不寧唯是又使圍蒙其先君將不得爲寡君老其蔑以

復矣。唯大夫圖之。子羽曰：小國無罪，恃實其罪。將恃大國之安靖已，無乃包藏禍心以圖之？小國失恃而懲諸侯，使莫不憾者，距違君命而有所壅塞不行，是懼不然。敝邑館人之屬也，其敢愛豐氏之祧？伍舉知其有備也，請垂橐而入，許之。○子產之辭，詳見春秋。傳朱子云：春秋之辭，命猶是說道理。戰國之游說，只說利害，聖人所以于爲命猶有稱焉。

或問子產。子曰：惠人也。問子西曰：彼哉彼哉。問管仲曰：人也。奪伯氏駢便平聲邑三百，飯疏食，嗣沒齒無怨言。

三子皆春秋大夫之著者。子產爲政本嚴，不鑄刑書。

作封漁別章服之類裁抑綜核之意多原其心爲鄭國貧寡而俗偷惰宗室侈汰不加約束則犯法日多貧困日甚故以禁奸豐財足國爲要所謂愛之而勞生之而殺也故曰惠人彼哉者異己之辭不與己同心同道也楚昭王欲用夫子子西阻之故謂異己春秋世夫子甚思用于楚子西爲梗大道遂廢重歎彼哉致惋惜也聖人無我豈爲我而彼之乎人也謂此亦時輩中一人也沒齒終身也管仲奪人之有且使人甘心窮約終身無怨言此甚未易蘇軾謂北伐戎南服荆楚易而服伯氏之心難伯氏有罪管仲削

奪其邑桓公卽以封管仲若桓公奪之非管仲有之則不怨管仲猶易耳飯疏食極言其貧也至沒齒而不怨誠服也人齒主落視年故年曰齒

左傳昭公二十年子產有疾謂子大叔曰我死子必爲政唯有德者能以寬服民其次莫如猛夫火烈民望而畏之故鮮死焉水懦弱民狎而玩之則多死焉故寬難及大叔爲政寬國人多盜取人于荏苒之澤大叔悔之仲尼曰善哉政寬則民慢慢則糾之以猛猛則民殘殘則施之以寬寬以濟猛猛以濟寬政是以和及子產卒仲尼聞之出涕曰古之遺愛也

春秋有三子西。鄭駟夏楚闕宜申。與公子申駟夏未嘗當國。無稱宜申謀弑被誅而去夫子時遠。獨公子申以賢聞。楚平王之長庶子也。平王卒。令尹欲立子西。子西不可。遂立昭王。而相之有吳難。子西遷都于郢。楚國以定。昭王欲用夫子。子西阻之。卒召故太子建之子勝爲白公。勝作亂。子西死之。○說苑楚昭王召孔子。將使執政。議封以書社地七百。子西曰。王之臣用兵有如子路者乎。輔相有如顏回者乎。使諸侯有如宰予者乎。官尹有如子貢者乎。昔文王處豐武王處鎬。百乘之地。伐上殺主。立爲天子。世皆曰聖王。

今以孔子之賢而有書社七百之地三子佐之非楚之利昭王遂止夫善惡之難分聖人猶見疑而況賢者乎世之不知孔子者衆矣孔子未嘗疾疾夫知我而疑我者耳

荀子曰齊桓公見管仲之足以託國是天下之大知也忘其讐立以爲仲父是天下之大決也立以爲仲父而貴戚莫之敢妬也與之高國之位而本朝之臣莫之敢惡也與之書社三百而富人莫之敢匹也○伯氏齊大夫姓名不可考食邑三百家朱註云奪伯氏駢邑卽荀卿謂與之書社三百也按荀卿謂書社

三百。本楚昭王欲封孔子書社七百。而例爲言也。昭王封孔子止七百家。古者二十五家爲里。里一社。籍其同社人姓名。謂之書社。社二十五家。三百社。則七千五百家。以民數言也。駢邑三百。以土地言也。駢併也。駢邑猶云連城。孔註云地名非也。八家爲井。四井爲邑。邑凡三十二家。駢邑三百。共九千六百家。爲田千二百井。古者大夫千室之邑。爲田一百二十井耳。古邑有不滿三十二家者。如所謂十室之邑是也。四井人聚居。則稱邑。五畝之宅。二畝半在田。二畝半在邑。是也。

子曰貧而無怨難富而無驕易

此聖人體恤人情語教人勉其難以安貧也怨發出衷拔之爲難驕氣外增平之差易此就恒情言耳若聖賢兩事皆易在學者兩事皆難孔顏貧樂何但不怨未足爲難如舜禹周公方稱不驕安見獨易說者謂逆境易持順境難持如人忍痛易忍癢難是學問入微之功此較人情處遇之常而已

子曰孟公綽爲趙魏老則優不可以爲滕薛大夫

凡官長曰老家老者大夫家臣之長也所職惟采邑財用出入之數貪墨者侵費生事廉靖者可坐而領

之若大夫從政國事煩重須有幹理之才孟公綽廉靖自守而短于才以爲家老雖趙魏大家之老有餘以爲大夫雖滕薛小國之大夫不足然則家小于趙魏而國大于滕薛者可知今爲魯大夫大于滕薛矣以爲家老者爲大夫用非其才豈無廢事朱註未達○孟公綽魯大夫襄公二十五年春齊崔杼帥師伐我北鄙公患之公綽曰崔子將有大志不在病我必速歸旣而果然殆於有識者夫子言其才不稱位而史稱夫子所嚴事于魯則孟公綽重其不欲也

趙魏二邑皆晉卿之家趙氏與秦同出伯翳後飛廉

五世孫曰造父善御周穆王賜之趙城遂爲氏七傳而有叔帶者去周幽王事晉文侯晉乃有趙氏五傳爲趙夙封于耿與畢萬共事獻公又九傳爲趙籍分晉是爲趙烈侯○魏本畢公高之後姬姓武王封高子畢有畢萬者事晉獻公與趙夙共伐霍獲耿魏二邑獻公以耿封夙以魏封萬萬後爲魏氏五傳爲魏斯分晉是爲魏文侯當夫子時晉漸分趙簡子執魏獻子舒專晉鞅再傳爲趙籍舒三傳爲魏斯

滕國姬姓侯爵文王第十子叔繻之後武王封于滕卽今山東兗州府滕縣傳三十一世爲宋偃王所滅

○薛國任姓侯爵黃帝裔奚仲後事夏禹爲車正封于薛歷商及周末爲宋偃王所滅傳六十四代千九百餘年三代諸侯享國之長莫與比今滕縣東南四十九里有薛城地里志云奚仲遷于邳湯相仲虺居其地

子路問成人子曰若臧武仲之知公綽之不欲卞莊子之勇冉求之藝文之以禮樂亦可以爲成人矣曰今之成人者何必然見利思義見危授命久要去聲不忘平生之言亦可以爲成人矣

凡有偏缺者不稱成禮器云禮不備君子謂之不成

人子路信果自負薄視儕俗如下文所云今之成人者夫子因其果而彥歷舉時流材品相似者進之以中和文潤色也禮樂卽中和此勇者對治之藥舉卞莊卽影子路言人各隨其材器學問涵養皆可成人非兼四子亦非指定四子也四子自難兼聖人因材曲成重在禮樂而已文之云者未必致中和但矯弊補偏勿任氣質便有禮樂之文可爲成人非如朱註材全德備渾然不見一善成名之迹中正和樂粹然無復偏倚駁雜之敝此惟聖人乃可正不欲以此求備也今之成人以下子路復夫子語今之成人隱然

薄武仲公綽輩不足齒何必然謂今人所不足者非
禮樂卽何必讀書之意夫子欲以禮樂文其野彥而
子路憤時俗之浮夸疾文勝爲虛僞猶老子忠信薄
之意夫子亦竟無以非之

今人有一材一藝但肯學道卽是古人不學雖多材
只是今人故禮樂不可斯須去身武仲要君公綽尸
位卞莊輕生冉求聚斂祗爲無禮樂大舜之智伯夷
之清湯武之勇周公之藝乃建中和之極今之成人
因四子皆今人而發憤時之論猶子貢問士而及今
之從政者云爾授命猶言舍生久要舊約也平生素

時也利害不苟言語必信皆子路所自負。狐路不恥
思義也。臺下結纓授命也。小邾射來奔。不盟而信。子
路一言。久要不忘也。廉恥忠信。人道根本。無文章禮
樂。何傷不然。本實撥而浮華勝。故曰何必然。

臧武仲名紇。文仲之孫。宣叔之子也。形短小而多智。
時稱爲聖人。齊莊公乘晉有樂氏之難。伐晉。取朝歌。
時紇以罪奔齊。齊侯將以田與紇。紇知莊公將有崔
杼之禍。弗欲受。因其言伐晉。對曰。多則多矣。抑君似
鼠。晝伏夜動。不穴于寢。畏人故也。今君聞晉亂而後
作。寧將事之。非鼠如何。乃弗與。田仲尼曰。知之難也。

有臧武仲之智而不容于魯國。作不順而施不怨也。
杜預註云。能避齊禍。是武仲之知也。○初季孫愛臧
孫。孟孫惡之。及孟孫卒。臧孫入哭甚哀。涕出其御曰。
孟孫之惡予也。而哀如是。季孫死。其若何。臧孫曰。季
孫之愛我。疾疢也。孟孫之惡我。藥石也。美疢不如惡
石。孟孫死。吾亡無日矣。果敗。

卞莊子魯卞邑大夫。不知其名。或云曹叔振鐸之後。
食采于卞。遂氏焉。新序云。卞莊子好勇。養母。戰而三
北。交游辱之。母死。魯與齊人戰。莊子請從。見于將軍。
曰。初與母處。是以三北。今母死。請塞責。遂赴敵。獲一

甲首獻曰此塞一北又入又獲一甲首獻曰此塞再
北又入又獲獻曰此塞三北將軍曰止莊子曰三北
以養母是子道也吾聞之節士不以辱生遂赴敵殺
十人而死○卞莊子方刺虎有豎子止之曰兩虎方
食牛甘必爭爭必鬪鬪則大者傷小者死從傷刺之
一舉有雙虎之名從之果獲兩虎○荀子曰齊人欲
伐魯忌卞莊子不敢過卞晉人欲伐衛畏子路不敢
過蒲

卞魯下邑春秋僖公十七年夫人姜氏會齊侯于卞
今兗州府泗水縣有古卞城

子問公叔文子於公明賈曰信乎夫子不言不笑不取乎公明賈對曰以告者過也夫子時然後言人不厭其言樂然後笑人不厭其笑義然後取人不厭其取子曰其然豈其然乎

大道本乎人情不言不笑不取所謂土木形骸者也夫子特疑其矯強非人情而公明賈爲解釋如所云時措咸宜益似聖人之忘情矣不言不笑不取後世陳仲子孫登輩皆能之言笑取以時惟聖人無意必固我乃能適中雖顏子不遷不二欲從末由發皆中節是中和之極致也夫豈容易實非有心于亢之由

其識見孟浪不自知言之過耳。聖人與人爲善而文子備先達不欲直貶第云所言誠然文子豈其能然乎。其然者信有是理豈其然者或未造是域也。

公叔文子衛大夫公孫枝也。獻公生成子當當生文子枝枝生戌。左傳定公六年魯伐晉過衛不假道靈公將使人追之時公叔文子老矣輦而如公止之。然則文子衛之耆舊也。故夫子不直非之。○檀弓曰公叔文子升瑕丘遽伯玉從文子曰樂哉斯丘死則我欲葬焉。伯玉曰吾子樂之則瑗請先。蓋譏諷之辭。又左傳公叔文子母朝而請享靈公退見史鮪告之史

鮪曰子必禍矣子富而君貪罪其及子乎文子曰若何史鮪曰無害子可以免富而能臣必免于難戍也驕其亡乎富而不驕者鮮吾唯子之見驕而不亡者未之有也戍必與焉文子卒公叔戍將去夫人之黨夫人慙之戍奔魯由此觀之文子死猶擇樂地豈能不笑者乎富而累後嗣豈能不取者乎○公明賈亦衛人公明姓賈名

子曰臧武仲以防求爲後於魯雖曰不要君吾不信也

初季武子與臧紇善武子無適嗣庶子公鉏最長武

子謀于紇立効以公鉏爲馬正鉏怨之孟莊子素惡
紇病且卒嗣未定其御豐點語公鉏曰能立庶子羯
者請爲報臧氏孟莊子卒公鉏謀立羯會紇來弔哭
之哀羯告季氏曰臧孫將爲亂紇懼而設備及孟氏
葬除墓道紇助之以甲從羯又以告季氏季氏怒攻
臧氏紇斬鹿門之關出奔邾其弟臧賈臧爲奔鑄紇
復如防使弟賈納蔡龜于魯請立後賈使爲爲遂自
請魯人乃立爲紇去奔齊按臧紇之始奔也得罪于
季氏非得罪于魯君也卽云斬關罪不至不祀何必
請卽請何必以防防臧氏私邑也以據也據防將叛

也。欲魯復已而以請後爲名不可則叛及其弟立有貳志。紇計阻乃棄去。非紇本意也。故夫子追論發其隱如此。如舊註所云可不待聖言知矣。

表記云事君難進而易退則位有序易進而難退則亂也。故君子三揖而進一辭而退以遠亂也。三違而不出竟則利祿也。人雖不曰要君吾弗信也。臧紇違不出竟據邑請後故曰要君。

防魯北鄙邑近齊今山東沂水縣東南有防城

子曰晉文公譎厥而不正齊桓公正而不譎

道之所忌莫如譎譎詐也正直也齊桓晉文二公皆

霸主行事假仁義各自以爲正而原其心則皆譎譎
不離正正不離譎聖言妙于闡幽也不正者譎之至
不譎者正未純伯仲反覆之間耳先文而後桓者春
秋所惡莫如晉所惡于五霸莫如晉文主盟八年書
十有八事皆陰險刻薄世儒耳食不察也觀此後數
章皆舉齊桓管仲之功而于晉事畧不齒聖意可知
當世若無桓公開先定局以晉文之譎宜無不爲而
遑恤王室與同盟乎東周十二諸侯苟延殘曆皆九
合一匡所畱也故曰微管仲吾其被髮左衽此齊桓
公正而不譎之大者齊雖不朝葵丘下拜猶知有禮

晉文召王請隧。睥睨大物。不有桓公正始。重耳何難。作俑齊之霸也。仲父管仲。學焉後臣。經營數十年。而後事集。重耳亡命。反國數年。枝梧補葺。借秦人羽翼成事。納襄王。敗楚師。崛起。其創造規模。不及齊遠甚。葵丘五命。居然王者之言。有六經風範。晉世執牛耳。何嘗聞此嘉謨。桓公九合。存三亡國。伐楚平戎。不以兵車。有安靖之功。而晉文城濮一戰。壽張反覆。株連曹衛宋。離散其君臣。而瓜分其國。鄭世子叛父。歸齊。桓公以大義拒之。而晉文聽衛臣之訟。以囚其君。魯哀姜。齊女私于慶父。弑閔公。齊桓公數其亂。取。

而誅之境外而晉文親納弟婦展羸凡此皆正與不正之大者他可知也

晉文公名重耳晉獻公庶子也齊桓公名小白齊襄公庶弟也二公皆篡弑得國事詳春秋傳五霸之霸也二公爲盛夫子作春秋黜五霸而尤惡齊此二語春秋大義具矣孟子謂仲尼之徒無道桓文之事者諸傳穿鑿附會從史桓文始于左氏之僞爲丘明而紛紜于諸儒之凡例至謂桓文挾微興壞尊文武之業澤加百姓功潤諸侯離經害道無稽之言也

晉姬姓侯爵成王取唐堯故地封其幼弟叔虞國于

翼南有晉水故號晉卽今山西平陽府翼城縣十一
傳至昭侯封其弟成師于曲沃爲桓叔卽今平陽府
曲沃縣再傳其孫稱是爲曲沃武公伐晉侯緡滅之
賂周釐王得命爲晉侯武公生獻公詭諸獻公生太
子申生惠公夷吾文公重耳晚得驪姬生奚齊卓子
殺太子申生而重耳夷吾出亡獻公卒大夫里克殺
奚齊卓子夷吾反國爲惠公卒子圉立爲懷公重耳
同母女弟爲秦穆公夫人故秦人納重耳殺懷公是
爲文公從行者五人趙衰狐偃賈佗先軫魏犢在外
十九年反國年六十二矣卽位九年卒其子孫爲諸

侯盟主百五十餘年。春秋終而晉衰。六卿強。後六世分爲韓趙魏三國。晉亡。

齊國見第六篇。桓公事見下章。

子路曰。桓公殺公子糾。召邵忽死之。管仲不死。曰未仁乎。子曰。桓公九合諸侯。不以兵車。管仲之力也。如其仁。如其仁。

曰未仁。子路以己意斷之也。子路謂管仲未仁。論心術也。夫子謂如其仁。論事功也。子路以管仲死爲愛子糾。夫子以管仲生爲愛天下。天地之大德曰生。聖人非較勘到十分當死。不責人死。非較勘到十分不

當生不怪人生此天理人情之至也死所重于生者
爲臨臣子之大節也子死孝臣死忠萬無一可生則
死之若尋常交遊意氣無君臣父子之分患難相隨
可以死可以無死死如有濟可也不死無益不可也
今旣無當死之義而死又無濟不死且有功聖人何
苦責人必死乎所以與其仁正以釋其不死也

齊襄公無道國內大亂子糾小白皆襄公弟鮑叔牙
與小白奔莒管仲召忽與子糾奔魯各因其母家也
未幾公孫無知弑襄公自立大夫高傒及雍廝人殺
無知使人召小白于莒魯聞無知死亦以兵送子糾

使管仲別將兵遮莒道戰管仲射小白中帶鉤小白
佯死魯送子糾者行遂緩六日至齊而小白入矣發
兵拒魯師敗于乾時絕其歸路脅令殺子糾索管召
魯殺子糾于笙濱召忽自殺管仲請囚歸于齊鮑叔
牙與管仲有舊迎之堂阜脫桎梏薦于桓公委政焉
桓公之霸皆管仲之力也著書五十八篇曰管子○
初齊襄公之亂鮑叔召忽管仲名以安國家自負是
時小白子糾嗣位未定非素有主臣之分也管仲嘗
自言夷吾所死者社稷破祭祀絕非此不死初志已
然非中道食言也家語孔子云子糾未成君管仲未

成臣束縛而立功名未可非也召忽雖過于取仁未足多也卽此章之意尤與勿同春秋傳作糾與鳩通詳後諸侯爭戰民苦屠戮管仲相桓公爲盟主糾合諸侯使勿相攻所以糾合者惟脩好會設約誓仗信義其力本強而不恃兵車故諸侯率從所謂定三革隱五刃而天下服者也管子書言桓公初年欲用兵仲輒止之其作軍令寄之內政曰知予之爲取者政之寶也故以不戰爲強如伐楚得盟卽止狄伐邢衛病杞寧遷徙周卹終不與戰戎伐周火其東門第往平之雖是籠絡詭計卽是保民大恩諸侯合則天下

安兵革不用則全活衆聖人好生故亟稱之曰如其
仁如其仁言孰如管仲之仁者而顧謂未仁乎大抵
仁道至大不主一端聖教多術不爲典要論管子存
心假公濟私非仁者之心論管子行事依傍天理卽
仁人之事心不可見而功不可掩如楚令尹子文齊
陳文子不許其仁論道應以心也管仲稱其仁論事
功以實也仁存于中以無爲體但涉一私卽礙虛體
仁發于事以有爲用但濟一物亦是實用聖道主濟
世故惓惓望諸賢如或知爾管仲有功不愈于死而
無聞者乎但望門爲仁脩己以安人管子務安人而

不知脩己無體之用所以羞其假也

古文多通用九數也易一三五合曰九陽數極于九故數多者常稱九鳥惟鳩多族而能變化象老陽故文从九說文鳩聚之九作勹加夕以別于數之九也莊子云禹九雜天下之川讀平聲與鳩通書云方鳩倂功王制農田註疏云九夫爲鳩鳩當一井又讀上聲與糾通絞察也周禮小宰云凡宮之糾禁詩云糾糾葛屨又云其笠伊糾皆絞結之意故春秋傳展喜犒齊師云桓公是以糾合諸侯卽九合也謂糾結之使合邢昺引穀梁傳云桓公衣裳之會九其餘皆兵

車之會考之春秋齊桓之會何止九凡經書會誌無
王耳誰問兵車與衣裳也此諸傳諛霸之陋說聖人
所僅取惟不以兵車奈何更言兵車之會乎

子貢曰管仲非仁者與平桓公殺公子糾不能死又相
之子曰管仲相桓公霸諸侯一匡天下民到於今受其
賜微管仲吾其被髮左衽矣豈若匹夫匹婦之爲諒也
自經於溝瀆而莫之知也

子路勇者輕生故責管仲不能死子貢達者重生故
責管仲不當相霸把也霸諸侯把持諸侯自爲盟主
也一齊也匡正也天下傾危能糾合使就匡正也管

子書有大匡小匡桓公嘗以自稱夫子就其言稱之云爾當世諸侯無王自桓公首事葵丘之命居然王者風猷五霸相循二百餘年託會盟大小相維雖詐力如重耳召王請隧而竟不敢移周室強如楚橫如吳越猶以盟相要天下雖亂冠履猶存諸夏未至淪爲夷狄皆桓公管仲先立之標也以迄定哀之間五霸將終而冠裳不改五命之烈猶存皆管仲之賜也微無也言管仲若死于子糾則當時無管仲卽無一匡弱肉強食如蠻如髦豈至今日被與披同散髮曰披衣衿曰衽華俗衿向右夷俗衿向左被髮左衽猶

言夷狄之有君不如諸夏無之意非攘夷之謂也管仲爲仁之心雖不可信而其近仁之功亦不可泯皆不死之所留也大丈夫死必爲社稷生靈有濟不然則無死故晏嬰不犯崔杼之難吳扎不正僚光之逆聖人不督過之若但踐然諾負氣而輕生是匹夫匹婦偏信之諒也小信曰諒知其一不知其他達人豈爲之蓋忽之死固一道也仲之不死又一道也無召忽之死無以勵管仲有管仲之功亦足謝召忽變而通之全其身以爲天下所見甚達若忽死仲與俱死如匹夫匹婦一倡一隨生同室死同穴爲諒而已夫

誰知之。管仲惟不然。故天下萬世知有管仲。此聖人至公平之論。

或謂被髮左衽。謂桓公攘夷。非也。自犬戎殺幽王。滅宗周。春秋爲夷猾夏作。是矣。然考諸春秋。夷狄爲中國患者無幾。如戎伐周。侵齊魯。侵曹。滅衛。滅邢。病杞。齊桓公北伐山戎。救燕。遷邢。衛。皆世所謂攘夷也。然而有名無實。春秋不齒。世儒轉以楚爲夷。服楚爲攘夷。夫楚本非夷也。而齊晉亦未嘗能服楚也。世儒強執諛霸無稽之說。詳春秋。畧見八佾篇。

匹夫匹婦。謂庶人無妻媵。一夫一婦相匹而已。風俗

通曰一晝一夜成一男一女成一室諒猶諒陰之諒書作亮小明曰亮今人謂天曉曰亮謂心照曰諒亮者明也諒者信也

君子貞而不諒卽匹夫之諒小明小信也孟子曰君子不亮也管子書云小諒者不能大立仲所自期也史記贊云賢者誠重其死夫婢妾賤人感慨自殺非能勇也其計畫無復之耳卽此意經綏也自經溝瀆猶言死溝壑也爾雅水注溝曰澮注澮曰瀆指生瀆也左傳魯殺子糾于生瀆召忽死之史記作竿瀆魯地名

言言言
卷四
二十四
公叔文子之臣大夫僕與文子同升諸公子聞之曰可
以爲文矣

衛大夫僕初本公叔文子之家臣所得與文子並立
公朝者文子薦與之同升也文子死而諡曰文非必
以此而夫子特據此事實之見人臣以進賢爲先也
大夫俊明有家文所以俊明也苟嫉賢妒能則曖昧
甚矣如臧孫辰亦諡爲文知柳下惠之賢而不與立
行同穿窬是爲竊位可以爲文乎春秋時世官大夫
蔽賢文子此舉有光明俊偉之度故聖人稱之
檀弓公叔文子卒其子戍請諡于君曰日月有時將

葬矣。請所以易其名者。君曰。昔者衛國凶饑。夫子爲
粥與國之饑者。不亦惠乎。衛國有難。夫子以死衛寡
人不亦貞乎。夫子聽衛國之政。制其班制。以與四鄰
交。衛國之社稷不辱。不亦文乎。按大臣不佐君恤民
爲粥于家。以市私恩。其惠不足稱也。齊豹之亂。公如
死。烏以死衛君。不見于經傳。脩班定制。卑禮厚幣。以
事盟主。春秋諸大夫。其誰不然。孟子所謂人役也。奚
文之有。故夫子但舉薦賢一事實之。

子言衛靈公之無道也。康子曰。夫如是。奚而不喪。孔子
曰。仲叔圉治賓客。祝鮀治宗廟。王孫賈治軍旅。夫如是。

奠其喪

子言靈公無道不舉其事父子夫婦之倫不正其大者聖人不顯言厚道也非與康子言而康子問焉是時魯哀公幼昏康子專恣違諸大夫之議伐邾招吳師魯國多難夫子語以國無道用人爲先猶稱鄭爲命之意吳季扎嘗悅遽伯玉史狗史鰌公子荆公叔發公子朝云衛多君子未有患也而靈公不能用用此三人三人者皆私寵也仲叔圉卽孔文子觀其處大叔疾孔悽之事生平可知祝鮀有口才夫子謂其佞玉孫賈以媚竈要夫子其人皆可知而小人未嘗

無材善任器使皆足效一割之用靈公無道不忘定
審是猶能睦四鄰也不忘宗廟是猶知有根本也不
忘軍旅是猶知有戒備也三子小有材而同心協力
故能枝梧旦夕曰奚其喪亦宜喪而不喪之辭如病
人服刳劑終非養生之經大抵用當其材頑石可以
攻玉枉其材驛驢不可以執鼠同使靈公能委任遽
伯玉史魚諸君子國長治矣何至繼世之禍乎聖言
蘊蓄類此

治幹辦也賓客鄰國之使待賓客有禮則不啟釁而
諸侯睦宗廟國之根本也古者國有大事聘享必于

廟祫禘烝嘗必合羣臣百姓以尊尊親親爲聯屬人心之本故禮云宗廟嚴則社稷重非事鬼神求福之謂也周禮大祝掌六辭賓客之辭命皆出于其手如定公四年皐鼬之會衛人先蔡以視鮑之辭也定公六年郭澤之盟衛靈公欲叛晉諸大夫不可使王孫賈朝國人而問之遂背晉則賈之習軍旅可知也三子人品皆卑而材藝皆可用論品雖才不掩其卑論才雖卑不沒其長非聖人至明至公何肯言此衛靈公名元衛襄公子也家語哀公問孔子曰當今之君孰爲最賢對曰丘未之見也抑有衛靈公乎公

曰吾聞其閭門之內無別對曰臣語其朝廷行事不論私家之際也公曰何如對曰靈公之弟曰渠牟其智足以治千乘其信足以守之靈公愛而任之又有士林國者見賢必進之而退與分其祿靈公賢而尊之又有士曰慶足者衛國有大事必起而治之無事則退而容賢靈公悅而敬之又有大夫史鰌以道去衛靈公郊舍三日必史鰌入而後敢入雖次之賢不亦可乎猶此章之意

王孫賈衛大夫靈公使之典軍旅嘗從靈公與晉大夫盟于鄆澤衛人請執牛耳晉人曰衛吾溫原也言

小比晉下邑

焉得視諸侯

按聲去

靈公手公欲叛晉患諸

大夫不從公孫賈要諸大夫國人從公子質于晉將行王孫賈問諸大夫國人曰若叛晉晉五伐我病何如矣皆曰五伐我猶可以戰賈曰然則如叛之病而後質何遲之有乃叛晉晉請改盟弗許

仲叔圉卽孔文子與祝鮀俱詳上篇

子曰其言之不怍則爲之也難

古者言之不出恥躬之不逮也惟其能恥所以不言而躬行苟無恥則信口誇誕原無爲志未待觀之行事知其難踐矣

陳成子弑簡公孔子沐浴而朝告於哀公曰陳恒弑其君請討之公曰告夫三子孔子曰以吾從大夫之後不敢不告也君曰告夫三子者之三子告不可孔子曰以吾從大夫之後不敢不告也

哀公之世三家專魯公室如贅旒夫子憂之久矣屬鄰國有弑其君者聖心岌岌然如將在魯也蓋哀公之昏不啻簡公季氏之橫何異陳恒是時夫子年已七十有一禮七十者非有大故不入朝茲沐浴而朝告于哀公請討爲大故也諸侯伐而不討此無君之賊人所共討也爲齊亦以爲魯也夫子豈不知哀公

不能主三子必不從顧君臣之義如之何其廢之苟
目擊其變而寂無一言則天生君子之謂何矣時勢
事理自不可無此一請及請而公不能主三家不聽
魯事可知矣故一則曰以吾從大夫之後不敢不告
言我爲臣尚爾況爲君者不能自主乎所以警哀公
也再則曰以吾從大夫之後不敢不告言我爲告老
之大夫尚爾況爲執政者乎又以警三子也不敢不
告一語聖人畏天憫人之隱衷天下萬世名義所關
縱賊長亂恬不知懼誠所不敢也卒之哀公死于有
山氏春秋以是年絕筆西狩獲麟在哀公十四年春

而陳恒弑君卽是年夏誠不忍復言陳恒與三家之惡踟躕而絕筆也故曰我欲託諸空言不如見諸行事之深切著明千載之下撫卷沈思猶堪殞涕春秋與論語傳寫聖人心思讀者貴知心世儒動稱上告天子下告方伯先發後聞如對癡人說夢矣

簡公齊君名壬景公之孫悼公陽生之子初景公卒安孺子立陳乞鮑牧弑孺子立陽生未幾鮑牧又弑陽生齊人立陽生之子壬是爲簡公初簡公與父陽生俱在魯闕止有寵及卽位使闕止與陳乞之子恒爲左右相陳恒殺闕止并弑簡公孔子三日齋請伐

齊哀公曰齊強魯弱子之伐之若何對曰陳恒弑其君民之不與者半以魯之衆加齊之半可克也公曰子告季孫孔子退而云云○初宰我仕齊陳恒弑簡公遂殺宰我故李斯短趙高爭二世曰田常爲齊簡公臣下得百姓上得羣臣陰取齊國殺宰我於庭遂弑簡公夫子此告其亦師弟同讐之誼與說者顧謂宰我助田常誣也或云闕止字子我訛傳爲宰我耳子路問事君子曰勿欺也而犯之

無欺而犯非兩時也無欺爲主直諍曰犯犯乃勇者之常勿欺謂求信諸心也苟未自信于心率爾妄發

是欺也。自反一毫無欺，則誠無不格。可無事于犯。卽有時不得已而迂觸忌諱，惟以達勿欺之心而已。犯干瀆也。犯上罪也。忠憤所激，窮迫無聊，遂以得罪。禮事君有犯無隱，卽此意。

子路之欺與他人異。勇者氣浮輕發而不能闕如。夫子嘗惡其佞，斥其行詐。以此臣子在公，每事宜覃思竭慮，勿冒昧率爾。誠意懇到，自然從容，不迫所謂切偲怡如何。至于犯故語，以勿欺使持其志而平其氣也。猶誨汝知之意而犯之者，遷就子路帶言非更教之犯也。或云僞言不直曰欺，直言無隱曰犯語勢。

一正一反教子路盡事君之忠戒欺君之僞也按子路素以忠信聞何至欺君勇者而又教之犯是誨亂也聖言約而婉解者未達

子曰君子上達小人下達

君子庸言庸行篤實謹守不越素位而日新月盛漸進于高明小人競名趨利之心勝而反約之功微自謂高世絕俗而驕恣放肆乃近禽獸凡言達者漸趨罔覺也君子上進如晨向旦至于日中小人墮落如晝向晚至于昏夜

子曰古之學者爲己今之學者爲人

學無二術古今同也而所學之心不同者之言這也
古之學此自爲也今之學此爲人也各從心曲隱微
分判同此五倫古人爲盡性今人爲好名同此六經
古人爲傳道今人爲習舉已最宜玩味篇中言克已
脩已反已恭已正已求諸已孟子云萬物皆備于我
我卽已也天地間惟有人人惟有已明乎已而天下
無餘道矣盡乎已而天下無餘學矣

遽

渠

伯玉使

下去聲

人於孔子孔子與之坐而問焉曰夫

子何爲對曰夫子欲寡其過而未能也使子使
乎使乎

夫子何爲見使問主之常辭也。使者之對出意外不述所爲之事而曲道其向善之隱衷。又不曰爲善而曰寡過。旣曰欲寡。又曰未能。悠然有反躬克己。唯日不足之思。卽使伯玉自道己志。何以加此。深達學問之要。不獨應對之善耳。未能字緊根欲字。惟欲寡過者。常自覺有過。夫子于旣出而歎之。誠有味乎其言也。聖人氣象從容深遠似此。

蘧伯玉衛大夫名瑗

阮

夫子適衛主于其家。史記云。

孔子所嚴事者。于周老子。于衛蘧伯玉。于齊晏平仲。于楚老萊子。于鄭子產。于魯孟公綽。○莊子云。蘧伯

王行年六十而六十化○淮南子云遽伯玉行年五十而知四十九之非○靈公嘗與夫人夜坐聞車聲至闕而止過闕而有聲夫人曰此遽伯玉也仁而有智敬于事上此其人不以闇昧廢禮也

子曰不在其位不謀其政曾子曰君子思不出其位

夫子之言已見泰伯篇曾子之言述周易艮卦之文辭也記者以類附之舊本合爲一章艮爲山有止象說詳易思者心之神明不出位者止于其所也心不失官則止于其所心止于其所則自無不在之謀苟思慮朋從則身在江湖心遊魏闕往來憧憧矣夫子

言涉世爲下之事也。曾子言事心爲學之事也。然爲學不外涉世。人當隨時隨事而存其心也。子思云。君子素其位而行。孟子云。學問之道無他。求其放心而已。世謂孟子受學于子思。子思受學于曾子。以此蓋曾子得之夫子。夫子得之義文。其旨同也。

易艮之象曰。兼山艮。君子以思不出其位。艮卦三畫一陽止于二陰之上。如山在地上。止而不動。六畫則兩艮如兼山並峙。君子觀象。知人心隨感敵應。如山之止。身在卽位。位在卽心。富貴貧賤夷狄患難安于所寓。父子君臣仁敬孝慈。得其所止。守分循理。坦蕩。

自如而官止神凝屹如山立是以爲良蓋思者心之官不思則昏妄思則擾能寂能惺思其所當思而不思其所不必思則心守其官神不離舍矣若隨耳目應緣流浪遷徙如官長不坐堂上親詣六曹與吏胥爲伍何以臨民而聽治乎

子曰君子恥其言而過其行

一恥一過皆甚之之辭以矯其偏也言不恥不謹行不過不力恥僅足以矯放過僅足以補不及

子曰君子道者三我無能焉仁者不憂知者不惑勇者不懼子貢曰夫子自道也

仁知勇三者天下之達德也。憂惑懼三者人心之大害也。有三德自無三害。此學問之極功。聖人之能事。道言也。君子道者。君子所常言者也。君子常言仁。君子本仁者也。常言知。君子本知者也。常言勇。君子本勇者也。知仁勇者德之名。不憂惑懼者德之實也。君子實踐其言。我未能。則何敢言。蓋因子貢不行而言。故自述以警之。聖人雖仁知勇兼至。而卒未嘗忘憂惑懼之慮。況學者乎。子貢不達。但云夫子所謂君子之言。是夫子自言也。天下孰有言無遺行如夫子者乎。此因上章恥言過行類記之下。承以子貢方人皆

教乎也

子貢方人子曰賜也賢乎哉夫我則不暇

方人比方人物之賢否與知人異知人者知人之賢以爲效法之資方人者專評他人而疎于治已所以蔽也賢乎哉者因方人教之自方也賢猶勝也我不暇謂自治無餘功也家語衛將軍文子問于子貢曰吾聞孔子之施教也蓋入室升堂者七十有餘人其孰爲賢子貢歷舉顏回以下至高柴十餘人行事對入告于夫子夫子善之亦舉伯夷叔齊以下至羊舌大夫十餘人以告此所謂知人爲觀法之資也方人

君子不暇不知人亦君子所患

子曰不患人之不知患其不能也

人之知已知其所能也已之見知于人以其所能見知也能謂學之成也已能而人不知責在人已未能而望人知烏可得故君子患在已不患在人

此語凡四見學而篇與里仁篇語畧同此章與衛靈公篇君子病無能語畧異皆欲人自脩也

子曰不遑詐不億不信抑亦先覺者是賢乎

逆迎也億度也許有機械陷害之意不信者唯諾之間失實耳覺者自然之明抑轉語也聖人本天理人

情至公無私以待天下雖有揆度亦不爲逆億有所
揆度而不售小人之罔亦不害爲先覺所惡于逆億
者以忌刻之心待天下疑所不必疑在已先詐不信
矣猜疑恍惚焉能照物之情即使偶中以揣摩勝人
烏得賢賢猶勝也唯是平心應物以詐不信來自無
逃于易簡者之觀蓋虛自慧公自明靜正無物物來
自覺狐狸之魅人不能察者情勝也鏡能照之者無
心也易曰知幾其神所以爲賢然此論君子待天下
之心云爾若夫舜喜象周公用管蔡何病于不覺孔
子殺亡聽言觀行亦何害爲逆億不然欲如土木無

情自覺亦無此理欲盡發不見之隱萬無一失又何必然

微生畝謂孔子曰丘何爲是栖栖者與無乃爲佞乎孔子曰非敢爲佞也疾固也

微生姓畝名或云卽微生高栖栖如鳥懸枝不丟之貌佞如佞佛佞倖之佞工爲媚悅也固執滯不通也巧言令色與世周旋微生所謂佞也高蹈遠舉遺世獨立微生所謂不佞也頑然木石不關痛癢夫子所謂固也萬物一體立達與俱夫子所謂不固也若鄉原之不固則佞矣若沮溺之不佞則固矣佞者小人

之尤斷然不爲故云不敢固則疑于君子而不通方
故疾之微生蓋高年而隱者其問甚倨夫子對之甚
恭無譏刺意

學道最忌固讀書固則隻字不可通處世固則一步
不可行聖人至處亦惟無固所以無可無不可子云
學則不固顏子好學所以知幾知幾則不固矣

子曰驥不稱其力稱其德也

此孔門教學典刑自三五帝王降凡開物成務戡亂
致治皆以才然皆德爲主以運其才至五霸尚功名
專任才而遂流爲權謀人心世道壞矣夫子正六經

發揮天命人性三德五倫之教一以德為主雖以魯之式微而忠厚猶許其至道齊雖強而尚功力僅許至魯皆論德不論力也故管晏孫吳輩雖多才非聖人之徒藝如冉求無能改德猶鳴鼓攻之五尺童子羞稱五霸正爲此也故臯夔周召譬之良驥德力兼全也管晏孫吳如蹄齧之馬有力而德不足者也後世南宋理學諸臣如馴服之馬有德而力不足也不得已寧爲馴服之馬所以宋室雖亡天理人心猶在○驥良馬名驥善走而調良無詭銜竊轡泛駕破轅之病善走而蹄齧者凡馬耳驥所以貴也荀子云驥

騶騏驥纖麗騄耳古之良馬也後世詩云老驥伏櫪志在千里烈士暮年壯心不已又云騏驥馬不試娑娑槽櫪間壯士志未伸坎坷多辛酸皆以良馬比君子也

或曰以德報怨何如子曰何以報德以直報怨以德報德

以德報怨者有心矯世凡怨必以德報之也何以報德者謂怨且以德報又何以報有德者乎以直報怨至公無私也以德報德雖私卽公也君子寬平樂易無一毫忿恨于胸中聖人每云遠怨云怨希云家邦

無怨怨非仁人樂易之懷不能大公順應而挾忿偏主卽是不直直順也順理曰直合天理當人心而已懷私報復有意刻薄固非直有意矯薄爲厚亦非直用舍予奪順理直行以此報怨則怨而無怨報而無報豈得謂之報怨乎若夫德則必以德報之要曲從厚如父子相隱天理合當不爲偏曲雖加厚不爲嫌大抵忠厚之心不防少增刻薄之心毫不可有愷悌溫良方是聖賢學問道德不遠人情聖人以人情爲田所以爲中庸之至德也此章與答葉公論直皆近情之論過此以往則爲行怪解者動引禮與春秋復

君父之讐。謂聖人有必報之怨。夫君父之讐。世上有幾。此論士君子涉世存心之常耳。未可引君父爲例。教學者脩怨也。春秋世諸侯脩怨。所以大亂南宋。諸儒恥其君屈節事虜。忘微欽之讐。經筵進講春秋。必以攘夷復讐持論。學者師宋儒而不通變。強聖言附末議。失之遠矣。說詳春秋禮記。

子曰莫我知也。夫子貢曰何爲其莫知子也。子曰不怨天。不尤人。下學而上達。知我者其天乎。

聖人何意人知。歎不知已者。歎其不知道也。卽二三子以我爲隱乎。知德者鮮矣之意。聖人身卽是道。民

可使由不可使知。知我者將與我共借之大道之中也。子貢英華大著，有希世之心。君子黯然日章，莫知而知，乃爲天知。自歎以教子貢也。此章乃聖學宗旨，性命實際，微顯無間，所謂素其位而行，依乎中庸，遯世不見知而不悔，唯聖者能之也。聖學安身立命在此。若夫枝葉形迹，與世作緣，皆怨尤之私，僥倖之計，標新炫奇，急人知而名者也。聖人不識不知，俯仰無累，道不離子臣弟友，位不辭貧賤患難，尋常日用，時習不厭，所由卽著，所行卽察，視聽言動，卽是神化性命。愚夫愚婦皆與知與能，是則聖人而已矣。故曰默

而識之吾有知乎哉無知也聖人且不自知何況人知之惟無聲臭之表不覩聞之中脉脉妙合蓋世間無天外之人無命外之性聖人猶人耳惟其同體太虛先後無違所以默契若夫見聞影響如子貢多識之學不離世緣與天道無言行生尚隔可以人知而不可天知也

不得于天而不怨不合于人而不尤正是無心境界不怨不尤者反求諸已也卽下學上達之心下學而上達者功先爲已卽是不怨不尤之事易曰形而下者器也形而上者道也下學者人事也上達者天理

也。凡可見可聞可思慮者，皆下學不可見聞思慮者，皆上達無時無處無下學。卽無時無處非上達，此中庸之至德，非待下學畢而後上達也。先儒云：「饑時喫飯，倦時眠，只此脩行。」玄更玄禪語云：「神通并妙用，運水及擔柴。」卽下學而上達之意。

或問朱子云：「聖人何須下學？」答云：「休說高了聖人說得聖人低，越有意思。如此便涉有心。其實聖人何嘗離低？若謂聖人不學，則是兀坐若學。豈外人倫日用人倫日用是低，便是下學。卽此達便上不達，只是不如民可使由之，是下學不可使知之，祇爲不上達。」

之而知之便下學而上達矣。謂聖人上達不下學是聖人知之不由之也。不由將知安頓何處。此並與教子路對葉公章參看。其旨精微而其言不離平常。所以爲下學而上達也。罕言命與仁性與天道不可得聞。以此後儒講學玄之又玄矣。

道不離器。上下者一物而有高卑之名。如水有清濁。上爲清。下爲濁。其實一水也。元炁輕清上浮爲天。重濁下降爲地。此道之大原也。故但可言上下而不可分精粗彼此。然則下學宜何先。曰先行。世儒誤解格物致知。謂學先知而後行。是以知爲下學。行爲上達。

也。易云：知崇禮卑，禮履也。卽行也。崇效天，卑法地。乾知坤作，知無爲，行有迹。聖人知卽是行，衆人行而不知，故曰：知我其天。學者求知必先行，有行而不知者，未有不行而能知者也。子路聞斯行之，知德者鮮，故夫子誨以知。子貢不行但求知，故教以行。故曰：人莫不飲食也，鮮能知味也。民可使由之，不可使知之。由然後知也。孟子云：行之而不著，習矣而不察，終身由之而不知道者，衆也。自後儒先知後行而學術荒矣。天下知而不行者，何多也。人匪草木，其誰無知。凡補開示諸賢皆語以行事，不言性與天道，尚行也。其

自言惟曰躬行君子吾未之有得故行者下學也知
者上達也聖人生而知之學者強忍而行之事也
也以習孟子之言性也以才皆下學上達一貫之言
也二氏語上遺下先知後行故荒唐無用後儒踵之
非聖人之教也

公伯寮愬子路於季孫子服景伯以告曰夫子固有惑
志於公伯寮吾力猶能肆諸市朝子曰道之將行也與
命也道之將廢也與命也公伯寮其如命何

聖門諸賢多仕于季氏者使皆與季氏相得何足以
表諸賢子路得謗自是伉直不阿賢于冉求遠矣愬

譖也。季孫桓子斯也。夫子指季孫固有惑志。謂惑不可解也。殺人而陳其尸曰肆。貴者肆于朝。賤者肆于市。伯寮之慙。不言所事。按定公十三年。子路爲宰。謀毀三桓城邑。收其甲兵。故季孫帥師墮費。叔孫墮郈。皆子路之謀也。公伯寮之慙。蓋以此故。叔孫不肯墮。成子路遂去仕衛。嗟夫。三桓之無君久矣。子路與其死于衛也。無寧死于魯乎。夫子蓋深有望于二三子之仕季氏者。而伯寮慙行。是天不欲造魯也。子路去冉求。無能改于德。而魯竟不振。嗟夫。其真命也。夫天行曰命。道之興廢。關國運盛衰。非一人一家之事也。

子路墮三都。正夫子攝相之時。季孫忒。子路則夫子之去亦可知。故云將行將廢。不獨子路耳。所以安樂一受。播肉不至。不稅冕而行。孟子云。君子所爲衆人不識。嗟乎。其真不識也哉。故借命曉之。朱子謂聖人卽命不宜言命。然則聖人卽道將不言道乎。但聖人知命樂天。君子俟命畏天耳。

史記公伯寮字子周。孔子弟子。朱子以其魁子路。疑非門人。按陳亢亦弟子。而賢子貢於仲尼。冉求聚斂。聖人未嘗無誨。謂之非吾徒。則可。遂諱其爲門人。亦不廣矣。聖人不忍爲一弟子。殺一弟子。所以委諸命。

耳○子服景伯魯大夫子服何也孟氏之支庶孟獻子生孝伯孝伯生惠伯惠伯生昭伯昭伯生景伯子曰賢者辟世其次辟地其次辟色其次辟言子曰作者七人矣

賢者指當時高尚之士辟避去也所避有四事避世者舉世昏亂無國可仕所謂諸侯有善其辭命至者亦不就也其次謂世雖亂而猶有善國惟避其地之不可居者耳其次國雖亂君能禮賢猶未去及禮既衰色不善乃去也又其次禮貌既衰而又有不善之言乃去也此皆賢者知幾觀變明哲保身之事夫子

目擊辟世辟地辟言辟色者凡七人矣作節
見疑而作七人謂儀封人晨門荷蕢楚狂長沮桀溺
丈人皆不知姓名故撮舉其人數章云作者之謂聖
伏羲神農黃帝堯舜禹湯七人猶伯夷云神農虞夏
忽焉沒兮我將安適歸之意然則何獨遺文武乎明
指上文賢者言作起也去則起也猶變色而作之作
下章繼以晨門荷蕢可知蔡氏云味其語有天地閉
賢人隱之意朱子分作者句別爲一章今仍舊
子路宿於石門晨門曰奚自子路曰自孔氏曰是知其
不可而爲之者與

晨門昏閉門晨啟門關吏也蓋賢而隱者承上作者類記之不知姓名卽事以名也自從也不可時不可也爲之行道也晨門雖譏夫子實是夫子隱衷春秋之不可復爲唐虞三代夫子知之矣顧何忍遽棄之如慈母愛子子病不起終不忍立視苟有用我者何時不可爲篇中記七人所言皆有至理故記者備錄之以見聖道之大

石門齊地春秋隱公三年冬齊侯鄭伯盟于石門今山東兗州府東平州平陰縣西二十五里山上有石門東西相向可通行人相傳爲子路宿處

子擊磬於衛有荷蕢塊而過孔氏之門者曰有心哉擊磬乎既而曰鄙哉硜硜乎莫已知也斯已而已矣深則厲淺則揭器子曰果哉末之難矣

荷蕢素知孔子非待聞磬始知也朱子謂聞磬爲他心通迂也春秋之有孔氏人皆知之孔氏轍跡徧天下居衛久所寓之門豈荷蕢而不知乎既知孔氏之門擊磬者非孔氏而誰擊磬亦偶然事謂之有心者不指擊磬指其人也如云有心哉孔氏乎云爾解者遂謂聞樂知心亦迂也有心謂未忘世憂憤託晉抒寫耳鄙哉硜硜譏其畱連世故也深厲淺揭譏其不

識淺深也。列石渡水曰厲。褰衣曰揭。則猶宜也。言宜識時。不宜膠固。用則進。不用則退。久于衛。不合則當去。今不察淺深。求濟是鄙而固也。其言雖譏。寔是夫子本懷。故夫子亦無以非之。第就其言答曰。果然哉。天下無邦。無所往難矣。聖人無可無不可。硜硜正其所鄙。末之謂無往也。難矣。猶云行路難也。末之應斯已而已。難矣。應深厲淺揭。借其辭以寄慨而不自白。不得已之情。隱然言外。猶云喪家之狗。然哉之意。舊解謂果確忘世不難。夫忘世未易也。彼以硜硜譏夫子。不宜又以果確敵應。味其所言。亦不似果雖不深。

相知而其言未嘗不是故答之如此

磬以玉或石爲之考工記磬氏爲磬其形倨句如人
折腰之狀故俯躬謂之磬折也大者倨長二尺七寸
句長一尺八寸特縣小者編縣十有六爲一虞禮
笙磬在東頌磬在西○肩任曰荷蕢與塊通土連草
曰蕢詳見第九篇荷蕢農圃之流不知其姓名卽其
事以名之蓋賢者也厲與列通禮記厲山氏卽烈山
氏或曰厲者止不渡也讀如周禮厲禁之厲遮列也
或云水及帶以上爲厲膝以下爲揭

子張曰書云高宗諒陰三年不言何謂也子曰何必高

宗古之人皆然。君薨，百官總已以聽於冢宰。三年

高宗，商王武丁，中興賢君也。周書無逸曰：「其在高宗，卽位乃或亮陰，三年不言。」亮陰，天子居喪之名。諒，亮通明也。不昧曰亮，不見曰陰。陰，暗也。猶言昧爽，昏明之交。孝子三年愛慕，昏昏默默，故謂亮陰。猶詩云：「不出于耿也。」不言，謂不親政事發號令也。孟子云：「五月居廬，未有命戒喪大記云：『父母之喪，居倚廬，非喪事不言。』」子張疑此禮難行。夫子據禮解之，君所以得三年不言者，有冢宰代爲之言也。蓋凡禮有制，有情，通于禮之制者，能守禮；達于禮之情者，能行禮。孝子愁

居默處三年不出令者禮之制有時乎不得不言而心不忍言者禮之情也君不言而冢宰代言百官總已以聽者禮之制冢宰有時乎不敢專而不得不請于天子者又禮之情也夫子亦据禮之制告子張而禮之情隱然自足於言外矣

註疏云諒信也陰默也信任冢宰默而不言也禮記作諒闇鄭氏訓作梁庵卽倚廬鑒也三年註疏引杜預之說王喪卒哭除服三年心喪畢然後王自聽政杜預酷信左傳据所引數事影響猜度未足爲徵子云三年之喪天下之通喪父母之喪無貴賤一也齊

斬之服。飭粥之食。自天子達于庶人。未言天子既葬。卽除服也。若天子七月葬。卽除服。此後日月當服何服。服除。則不寢苦。不枕塊。不居廬。又不聽政。深宮燕處。而稱心喪。欲以何爲。禮惟師心喪。無服而爲此名也。夫喪孰非心。而獨師乎。故名心喪者。無服也。豈有親死。可以無服靜處乎。此卽後世以日易月之意。非古也。總已。總已。職內大小事。一聽冢宰處分。周禮天官冢宰。首六官。帥其屬而掌邦治。佐王均邦國者也。冢。大也。山頂曰冢。裁割曰宰。百官約言。非謂官止百耳。周書云。唐虞稽古。建官惟百。夏商官倍。明堂位云。

有虞氏官五十夏后氏官百殷官二百考之周禮天子之官公卿大夫以至上中下士共官二萬五千二百六十有奇諸侯之官不與焉

子曰上好禮則民易使也

聖人論治惟禮爲要二十篇中言禮不一而足是乃脩己治人之本好禮者以溫恭退讓之精神運爲綱紀文章以束民之渙作民之情揉民之傲恭敬之心民所固有上好下甚則禮讓之風興矣使非奔走也卽草上風偃之意好與易相默應禮本嚴肅好之爲難惟克己能復禮惟盛德之至能周旋中禮恒情常

畏而憚之。老氏謂爲忠信之薄，其流爲任放無檢，則亂矣。聖人爲學爲政，必以禮。故曰：有禮則安，無禮則危。安危所係，奈何弗好？蓋欲之害人也，甚于寇盜而禮之衛人也，固于城郭樓櫓。雖密猶虞其疎，隍塹雖險猶恐其踰。未有厭樓櫓之大密，隍塹之大深者，人苟視欲如寇，守禮如城，雖終日百拜猶恐其逸，三千三百猶患其簡，況厭而不好乎？

子路問君子。子曰：脩己以敬，曰：如斯而已乎？曰：脩己以安人，曰：如斯而已乎？曰：脩己以安百姓，脩己以安百姓，堯舜其猶病諸。

萬物皆備于我矣已。卽我也。脩整飭也。整飭得已完。卽盡人盡物參贊位育皆備矣。是爲成已。凡已所以壞欲動情勝昏迷無檢則一切道德事功皆廢而已。爲行尸走肉同禽獸耳。天生君子謂何故已不可不脩也。脩之則以敬。敬者動必以禮。神常守舍惺惺歷歷不爲小體欺蔽。外物牽引無衆寡無小大無敢慢。則凡所注措無不合宜。庶事咸理。安人安百姓舉在脩已內矣。人對已而言。百姓盡人而言。子路蘧率任氣故以此斂之。蓋已卽身也。敬以脩已卽大學心正而身脩也。安人安百姓卽家齊國治而天下平也。曲

禮云無不敬儼若思安定辭安民哉中庸云戒慎恐懼成己成物篤恭而天下平夫子告顏淵克己復禮天下歸仁皆此理也聖人視己甚大非孑然軀殼之爲己非寂然煉形爲脩己堯舜脩己之敬非不足而安百姓之心終無窮百姓未必能全安安百姓不足卽是脩己分量不足故曰堯舜以上善無盡有盡非道也見道有盡非聖人也文王望道未見夫子自以于仁聖二十篇中謙謙之辭不一而足非託辭勉人耳道固然也釋氏亦云不度盡衆生誓不成佛夫生豈能盡度踏襲此意

原壤夷俟子曰幼而不孫弟長而無述焉老而不死是爲賊以杖叩其脛慶

聖教莫大于禮行禮莫先于敬承上好禮脩己以敬而記不學禮之戒也原壤孔子故人無禮曰夷夷與遲通俟待也禮迎賓必建其位相揖而進見先生必趨而進壤見夫子陵遲惰慢不起立不拜不揖曰夷俟言不敬也由其平日任放廢禮故夫子數其生平責之不孫弟不遜讓而失弟道也少不學禮故長無稱述迄今年老久在人世無益而反害賊猶害也害禮也三語襲平日不獨指夷俟耳杖夫子所自扶也

脛脚骨也。叩微擊也。檀弓云原壤母死夫子助之沐
椁壤登木曰父矣予之不託于音也。歌曰狸首之斑
然執女手之卷。拳然夫子爲弗聞也者而過之從者
曰子未可以已乎。子曰丘聞之親者母失其爲親也
故者母失其爲故也。蓋不孝之罪大聞之斯責之矣
責之斯絕之矣。故若爲弗聞也。此夷俟之罪小可不
至絕。故直數其事。聖人處友曲全如此。蓋彼惟于夫
子前放歌亦惟于夫子來夷俟。狂者恃聖人知己惟
聖人能函蓋之。彼憤世之拘瑣而竊聖人易簡之旨
偏用如老莊瞿曇皆所謂好智不學而爲蕩好剛不

學而爲狂者也。非不愛其親也。非不敬其長也。彼直以禮法爲牽縲。如衝風之巨羽。破轅之快犢。惟有天高地闊。足以範圍而馴擾之。使各遂其生。故居喪而歌。若弗聞也。子桑伯子大簡。亦未嘗不可之。曾點於季孫宿死。倚其戶而歌。狂態亦相似。而聖人終與點道大德。穴何所不包。故曰。攻乎異端。斯害也已。此間義理。皆夫子七十以後。從心之矩。難與初學言。故記者表其杖云。

註疏夷俟箕踞以待也。會叩脛意解。按夷俟猶言尸居夷平也。凡尸事稱夷。偃仰不動之貌。記云。男女奉

尸夷于堂。尸牀曰夷牀。衾曰夷衾。槨曰夷槨。聖人寢不尸。不偃仰也。壤見夫子來。据牀偃仰。不動如尸。亦箕踞之類。而卽箕踞訓未確。狂者土木形骸。佯不爲禮之狀。○杖以扶老。古者六十杖于鄉。原壤稱老夫。子謂之曰。不弟。則夫子年愈長矣。

闕黨童子將命。或問之曰。益者與。子曰。吾見其居於位也。見其與先生並行也。非求益者也。欲速成者也。

此承原壤不弟類記之。黨以闕名爲其童子。不知禮也。年十五以前皆稱童子。將命。夫子使童子傳命也。益者。謂來學求進益者也。先生。謂長者居位坐先生之

位也並行比肩行也禮童子侍立不命之坐不敢
坐則隅行則隨今居位並行非禮也欲速成欲亟爲
成人也年少傲慢正爲不求益故使將命學禮馴擾
其習詩云溫溫恭人維德之基蠟等長傲終非令器
聖人惟溫恭堯子不肖惟其傲耳

闕黨以義起名猶達巷互鄉之類闕猶損也與益反
闕思補則求益矣吾黨之小子不知所以裁之故夫
子設教處稱闕里荀卿云仲尼居于闕黨闕黨子弟
罔不知有親者多取孝弟以化之家語孔子始教于
闕里顏路始受學古君門亦稱闕言人臣望而思闕

也西北乾方不周謂之天闕故昔人有補天之說聖
人崇禮設教輔世淑民代天行化而補其不足也是
名闕里括地志云闕里在兗州曲阜縣西南二里水
經註謂孔廟東南五百步有雙石闕卽靈光殿之南
闕闕里之義本此按靈光殿漢景帝子魯恭王所建
何足爲微強附會之也